

靜

志

居

詩

話

靜志居詩話卷二十三

秀水朱竹垞先生著

扶荔山房編輯

閨門

婦人詩集始於顏竣殷淳爰有徐陵李康成玉臺之編
蔡省風瑤池之詠代加甄綵韋毅才調集輯閨秀一卷
宋元以降選家類不見遺明則鄭璠之彤管遺編張之
象之彤管新編田藝衡之詩女史劉之汾之翠樓集俞
憲之淑秀集周履靖之宮閨詩選鄭玟之名媛彙編梅
鼎祚之女士集青泥蓮花記姚旅之露書潘之恒之巨

齊東野語 卷二十三
史趙問奇之古今女史无名子池上客之名媛璣囊竹
浦蘇氏之胭脂璣蘭陵鄒氏之紅蕉集江邦申之玉臺
文苑方維儀之宮閨詩史沈宜修之伊人思季嫺之閨
秀集其文亦云富矣然青黃雜揉真屢交錯近濟南王
考功士祿悉從考正爲然脂集發凡起例有要有倫而
予斯編亦稍糾羣書之紕繆焉

郭貞順潮陽周伯玉妻

明初師下嶺南指揮俞良輔征諸寨之未服者貞順從
伯玉居溪頭寨作詩上之云將軍開國之武臣早附鳳

翼攀龍鱗烟雲慘淡遍九野半夜捧出扶桑輪前年引
兵下南粵眼底羣雄盡流血馬蹄帶得淮河冰灑向江
南作晴雪潮陽僻在南海濱十載不斷干戈塵客星移
處萬里外天子亦念遐方民將軍高名邁千古五千健
兒猛如虎輕裘緩轡踏地來不減襄陽晉羊祜此時特
奉明主恩金印斗大龜龍紋大開藩衛制方面期以忠
義酬明君宣威布德民大悅把菜一笠誰敢奪黃犢春
耕萬隴雲霓龍夜卧千秋月去歲壺陽戍守時下車愛
民如愛兒壺山蒼蒼壺水碧父老至今歌詠之欲爲將

軍紀勲績天家自有如椽筆願屬壺民歌太平磨厓勒
盡韓山石良輔覽詩大喜一塞得全

孟淑卿蘇州人訓導孟澄之女自號荆山居士

附錄徐昌穀云淑卿詩零落已多其傳者直欲與文
姬羽仙輩爭長 顧元言云荆山居士之論謂作詩

貴脫凡化質閨人不可有鉛粉氣覽其詩果然魚元
機之亞也題畫云嶺樹盤雲上溪迴路轉斜晚來烟
靄合何處問山家

陳懿德長興人移居仁和南康知府陳敏政之女

嫁同縣李昂

景泰甲戌進士

官至右副都御史

附錄顧元言云夫人詩集頗富句如深院雪消芳草綠小園風過落梅多情致幽絕足爲女郎之秀

朱妙端字仲嫺號靜菴海寧人尚寶卿朱祚女光

澤教諭周濟妻有靜菴集

靜菴詩頗流麗于歸之後移家海鹽故淑秀集明詩粹明詩妙絕俱作海鹽人客中偶成云異鄉久爲客風雨阻歸程兩岼數峰碧孤舟一羽輕篷窗殘燭在烟樹早鴉鳴坐待東方曙依稀見海城周青士謂其極似郭良

曉行之作竹枝詞云西子湖頭買酒家春風搖曳酒旗
斜行人沽酒唱歌去踏碎滿隄山杏花橫塘秋老藕花
殘兩兩吳姬蕩漿還驚起鴛鴦不成浴翩翩飛過白蘋
灘

附錄顧元言云靜菴籬落見梅詩可憐不遇知音賞
零落殘香對野人或譏其以所配非偶形諸吟咏子
讀其鶴賦云何美人之見獲遂羈絡于軒堦蒙主人
之過愛聊隱迹而栖遲斯可謂怨而不怒矣咏虞姬
云貞魂化作原頭草不逐東風入漢郊何其詞義之

烈烈也

馮銀字汝白瓊山人教諭源之女歸同邑唐繼祖
有孝行

汝白讀顏子簞瓢陋巷舍書起而作曰吾雖居陋巷朝
焉命僕以耕則有餘食矣暮焉督婢而織則有餘衣矣
暇與子觀書則有餘樂矣吾其與顏氏之子同儔哉臨
高王同知佐爲志其墓稱其幾于知道云暮春云綠暗
紅稀春已深嬾聽杜宇喚歸音凋榮何限人間事獨倚
蓬牕數過禽

鄒賚貞當塗人贈監察御史謙之女翰林編修濮

韶之母封孺人有士齋集

士齋女嫁費文憲公其詩甚庸都無林下風致士齋中
秋有懷云銀漢無聲夜夜清良宵忽感宦游情東山遙
望人千里想亦停杯對月明

屈安人華陰人總督漕運右副都御史直之女嫁

參議朝邑韓邦靖封安人有集

安人早慧十齡刺繡聞父訓諸子盡得其解尋令賦詩
悉合獲度其詩康德涵序之送夫人觀云君往燕山去

棄妾維水旁維水向東流妾魂隨飛揚丈夫輕離別壯
志在四方努力事明主肯爲兒女傷君有雙親老垂白
坐高堂晨昏妾定省喜懼君自量珍重復珍重丁寧須
記將旣爲遠別去飲余手中觴莫辭手中觴爲君整行
裝陽關歌欲斷柳條絲更長

黃安人遂寧人黃簡肅珂之女修撰楊慎之繼室

封安人

美人娟娟隔秋水杜子美句也其雨怨朝陽阮嗣宗句
也黃魯直寄蘇和仲詩用之曰美人美人隔秋水其雨

其雨怨朝陽楊夫人復用魯直語寄用修正陸平原所
云襲故彌新者其詞云鴈飛曾不到衡湘錦字何由寄
永昌三春花柳妾薄命六詔風烟君斷腸日歸日歸愁
歲暮其雨其雨怨朝陽相憐空有刀環約何日金雞下
夜郎方維儀謂其不織不庸格老氣逸

李玉英錦衣衛人

正德中錦衣衛千戶順天李雄西征陣沒遺孤五人子
二曰承祖曰亞奴女三曰桂英曰玉英曰桃英諸子皆
前妻所產惟亞奴後妻焦氏生焦欲圖親兒繼襲雄死

令承祖往戰場尋父骸骨覲其陷于非命而承祖竟抱
骨以歸焦乃鳩死承祖支解而埋之又以桂英鬻豪家
爲婢玉英頗知典籍年十六伶仃窮迫作送春詩云柴
門寂寂鎖殘春滿地榆錢不療貧雲鬢霞裳伴泥土野
花何似一愁人又作別燕詩云新巢泥滿舊巢欹泥滿
疎簾欲掩遲愁對呢喃終一別畫堂依舊主人非焦指
詩詞謂有外通等情俾舅焦榕執送錦衣衛誣以姦淫
不孝擬凌遲嘉靖四年夏差太監審錄罪囚凡有事枉
人寃許行陳奏于是玉英具本託其妹桃英齎奏訟寃

疏略云臣年十二遇皇上嗣位遍選才人府尹以臣應
選禮部憫臣孤弱未諳侍御發臣寧家臣年十六伶仃
無倚是以濫形吟咏感諸身心寄諸筆札蓋有不得已
而爲言者奈何母恩雖廣勿察臣衷但玩詩詞以爲外
通拿送錦衣衛本官誣臣姦淫不孝擬劓罪臣在獄日
久有欺臣孤弱而興不良之心者臣撫膺大慟獄中莫
不驚惶臣素不才鄰里何無糾舉乃以數句之詩尋風
捉影陷臣死罪臣之死固無憾十歲之弟毒藥鴆死肢
解埋棄果何罪乎臣母之罪臣不敢言凱風有詩臣當

自責陛下俯察臣情將臣詩句付有司委勘有無淫姦
實情推詳臣母之心盡在不言之表則臣亡父母之靈
亦可慰于地下矣有旨命三法司會勘焦氏論斬玉英
著錦衣衛選良才作配焉按玉英二詩本無關涉而緹
帥乃坐以極刑由是推之寃獄難以悉數矣

斗孃松江女子嫁姚生

斗孃送夫詩云遠逐風塵路遺書滿目愁思君不成寐
河畔看牽牛見沈津吏隱錄沈潤卿評云語意清雅

毛鈺龍麻城人雲南按察僉事鳳韶之女嫁少保

劉天和孫守蒙夫死誓不踰閩鄉人稱日文貞

夫人

節婦奉姑樓居不廢吟咏年七十九日無見猶使甥輩
讀之句如桃花暮雨烟中閣燕子春風月下樓詩句怕
題新節序淚痕多染舊衣裳讀之哀動頑豔咏鏡詩云
樣出秦宮製團團寶月迴虛空開物象心迹遠塵埃影
覆香羅帕光生碧玉臺繡囊鴛鳥並珍重嫁時裁

楊文儷仁和人工部員外應獬女餘姚孫陞繼室

封夫人詩附見家集

孫文恪初娶于韓後娶于楊諸子登進士榜者四人太
保吏部尙書清簡公鑰文中禮部尙書鋌文和太僕卿
錦文秉兵部尙書鑛文融皆楊夫人教之示文融詩云
何待三遷教傳經有父兄蓋謙辭也夫人精帖括斷決
不爽相傳文融會試後錄其文呈母夫人笑曰淡墨雖
書第一未免齧筆似魚非文之絕品也或言夫人有髯
年過百齡云秋日懷親云玉露沾花溼金風入幕涼天
連秋水碧山帶晚烟蒼撫景嗟時序懷親憶故鄉倚闌
凝佇久心逐雁南翔

桑貞白號月牕嘉興人處士周履靖繼室有香奩

詩草

周逸之處士作詩不暇持擇宜其閨人亦然然紙閣蘆
簾倡子和女偕隱太平之時亦樂事已寄遠云日暮登
樓強自歌陌頭楊柳望中多思君書劔天涯客三月春
光有幾何春日卽事云雨晴春暖百花香戲蝶游蜂各
自忙也擬東郊踏青去門前流水又斜陽

文氏邠州三水人長沙通判在中之女嫁葛氏早

寡守節力學有君子亭集

節婦爲光祿太青之姊寡居作九騷以見志九騷者一
曰感往昔二曰懷湘江三曰望洽陽四曰矢柏舟五曰
愀離幃六曰傷落花七曰臨雲歎八曰待月愁九曰撫
玉鏡其辭有云覩扶光之如箭兮哀歲月其難追拾朱
英而太息兮時不再來悲朱顏其易改兮唯寸心之不
衰辭義俱雅有古人之則悼懷云青青山上松年華不
可考灼灼園中花顏色不常好五月鳴蜩至八月蝴蝶
老感物有盛衰豈忍歸腐草

姚氏嘉興人自號青峨居士秀水范應宮之妻有

青娥居士詩屠緯真賞其清華流利陳仲醇尤稱之謂
玉鴛閣遺藁

青娥居士詩屠緯真賞其清華流利陳仲醇尤稱之謂
肝腸如雪能吟柳絮之詞志節凌霜直擬木蘭之操筆
牀茶竈不巾櫛閉戶潛夫寶軸牙籤少鬚髯下帷董子
及其卒橐砧哭之慟刊其遺詩及已哀悼倡隨之作傳
之鄉里焉竹枝詞云卓女家臨錦水濱酒旗斜挂樹頭
新當壚不獨燒春美便汲寒漿也醉人

梅生姓梅氏麻城士子周世遴伯玉妻

生有逸才兼工古文辭南昌王于一向予稱之其夫周

伯玉赴試省闈生賦落葉小詩寄之云落葉滿庭階秋
風吹復起遙憶別離人寂寞何堪此伯玉省詩悽愴不
入鎖院而返足以見伉儷之重矣傳聞生有外行未免
蘭形棘心曾填小曲寄情人云假若是淚珠兒穿得起
拚翦下一股青絲穿一穿寄把你于一謂古之喻淚者
曰沱若曰漣如曰流泉曰垂露曰連絲曰玉箸曰縷糜
曰鉛水曰日南珠未有道及此者于一好劇譚譚必傾
座斯言稍過綫不能穿淚珠本香山句爾

馬氏虎關將家婦有香魂集

氏秋閨夢戍詩云夫重封侯愛妾輕漫歌珀枕戀寒更
夢回遠戍相尋處芳草無言路不明莆田宋比玉得馬
氏詩集于荒邨老屋中見芳草無言路不明之句爲之
擊節錄而傳之

方維儀桐城人大理卿大鎮之女適姚孫榮再期
而天遂請大歸守志有清芬閣集

龍眠閨閣多才方吳二門稱盛夫人才尤傑出其詩一
洗鉛華歸于質直以文史當織紵尙論古今女士之作
編爲宮閨詩史分正邪二集主于昭明彤管刊落淫哇

覽者尙其志焉集中句若白日不相照何況他人
心高樓秋雨時事異疇昔何其辭之近乎孟貞
曜也死別離云昔聞生別離不言死別離無論
生與死我獨身當之北風吹枯桑日夜爲我悲
上視滄浪天下無黃口兒人生不如死父母泣
相持黃鳥各東西秋草亦參差子生何所爲死
亦何所辭白日有如此我心徒自知傷懷云長
年依父母中懷多感傷奄忽髮將變空室獨徬
徨此生何蹇劣事事安可詳十七喪其夫十八
孤女殤舊居在東郭新柳暗河梁蕭條下霜雪
臺閣起荒涼人世

何不齊天命何不常孤身當自慰且免摧肝腸鷓鴣栖
一枝故巢安可忘出塞云辭家萬里戍關路隔風烟賦
重無餘餉邊荒不種田小兵知有死貪吏尙求錢倚賴
君王福何時唱凱旋

方維則大理卿大鉉之女嫁生員吳紹忠有茂松

閣集

方氏三節一爲孟式字如耀大理卿大鎮之女嫁山東
布政使張秉文濟南城潰同其夫殉節贈一品夫人有
紉蘭閣集一爲維儀十七而寡壽八十有四一爲維則

十六而寡壽亦八十有四白圭無玷苦節可貞足以昭
諸管彤矣題竹云小院何空寂相依獨此君雪深愁易
折風急不堪聞白石移花影青苔擁籬文樓頭明月上
空翠落紛紛

姚淑人上虞姚克俊女餘姚黃尊素配

淑人年十六歸忠端當公入爲御史與楊左魏李諸公
早夜相過語及羣小陰謀輒形之歎息或至泣下賓退
淑人進曰公等不能先事綢繆涕泣何益公旣被逮淑
人每夜祈死北辰之下願以身代奄就誅賜章服三

品教其子宗羲爲復社領袖南國諸生顧杲等公訐閣
黨阮大鍼宗羲名居第三大鍼後柄用中旨逮治淑人
喟然曰豈意章妻滂母萃吾一身山陰劉公宗周常熟
瞿公式耜皆目之曰女師詠蒲扇云世間物性初無定
百鍊剛成繞指柔何似萑蒲經織後能將九夏變三秋
託物寓意不審關西惠元孺輩曾見之否

商景蘭字媚生會稽人吏部尙書周祚女祁公彪

佳之配

祁商作配鄉里有金童玉女之目伉儷相重未嘗有妾

勝也公懷沙日夫人年僅四十有二教其二子理孫班
孫三女德淵德瓊德苴及子婦張德蕙朱德蓉葡萄之
樹芍藥之花題詠幾遍經梅市者望若十二瑤臺焉送
別黃皆令云徵調起驪歌悲風繞坐發人生百歲中強
半苦離別念君客會稽釜不因人熱茲唱歸去辭珮環
攜皎月執觴指河梁愁腸九回折流雲思故鳥鮑鼠懷
故穴帆檣日以遠山川日以越同調自此分誰當和白
雪竚立望滄浪憂來不可絕悼亡云公自垂千古吾猶
戀一生君臣原大節兒女亦人情折檻生前事遺碑死

青志身詩詞卷二十三
三
後名存亡雖異路貞白本相成

項珮字吹聆秀水人處士吳統持之室有藕花樓

詩彙

吳處士巨手有大宅在北郭之秋涇得吹聆爲嘉耦琴瑟靜好詩篇酬和甚樂也遭亂家破轉徙無定跡糠粃不飽然未嘗聞交謫之言所題卍齋卽秋涇故居取方廣胸前字以爲曲闌鄉人題詠者紛紛惟吹聆詩俱從梵夾中出極其熨帖詩云夫子愛奇字迴欄繚繞之一時齊作卍三點不成六樹色春浮竝齋名繡佛宜定知

人載酒送喜有芻尼或疑、字韻書不收然三點成、猶有想、卽伊字苑舍人咸詩可據也

周淑禧江陰人周榮公第三女

至元斥賣廣濟庫故書有采畫本草一部近吳中趙凡夫子婦文俶端容設色畫本草曲臻其妙江陰周榮公二女淑祐淑禧臨之亦成絕品淑禧寫大士象一十六幅陳仲醇謂其十指放光直造盧楞伽吳道子筆墨之外今文俶真蹟尙有存者周氏姊妹花草見者罕矣又石城女子李佗那善畫水仙則余亦未之見淑禧杜康

廟詩云醑有新糟醲有醑杜康橋上客題詩最憐苦相
身爲女千載曾無儀狄祠按海內圖經罕載杜康祠宇
獨三吳有之相傳康有遺冢在江陰縣城南土人因於
橋下建祠以劉伶配之季給事科草募疏云詩傳雅詠
先歌既醉之章書有誥辭特謹德將之訓溯麴蘖流傳
既遠而古今風味攸同酒星在天醴泉出地舟中之斛
三百市上之價十千爰有飲中八仙竹林七子或沈或
酒孰聖孰賢緬懷作醴之功豈止忘憂之具今杜氏之
遺橋尙在而劉家之故巷猶存閱歲久而年深爲風侵

而雨剝茲欲樹豐碑之七尺翦棘誅茅建祠屋之三楹
崇基疊石俾千載相傳爲勝事賴一時共濟以落成文
頗流利然不若淑禧一絕之新警也

曹壽奴小字山姑崇禎間吳興女子有觀靜齋彙
壽奴詩頗有林下風致贈姊五古一篇其源出於楊方
詩云草有竝蒂花木有連理枝果有合歡核豆有同根
其魚或比目游鳥亦比翼隨同功繭作絲合香玉爲卮
我與子姊妹願得不相離出必同車輪居必聯屋楹見
月每共拜弄珠定雙嬉子妝我掠鬢子盥我捧匱我衣

擣子砧子濯滄我私機張我續織鏡聽子兼持子裹我
衾襦我舖子粥糜寒輒擁子背暑還扇我肌子女迭相
抱幃帳恒竝施生從比肩人沒以百歲期

李因字是菴會稽人

一云杭州人

光祿卿葛徵奇之妾

有竹笑軒吟草續彙

是菴善畫花竹之天斜禽鳥之跳躑具有生動之趣刻
沉香爲像以奉白陽山人詩其餘事爾然無鉛粉之飾
郊居用松陵集韻云避世牆東住牽船听上居雨分三
徑竹晴曝一牀書上坂驅黃犢臨洲網白魚衡門榛草

過長者莫停車

黃媛貞字皆德秀水人貴陽知府朱茂時副室有

卧雲齋詩集

皆德丁卯冬十二月留別妹皆令云北風悽以栗不忍
吹羅襟高雲語征鳥離思兩難沉今我遠庭闈與子分
芳衾寧忘攜手好所以傷我心一言一回顧別淚垂不
禁但得頻寄書毋使相望深山邨云春山春水碧依依
草屋風輕燕子飛行到半坡亭小住野雲何事亦來歸
貴陽解中云天涯二月早芳菲官舍何曾遠翠微如此

溪山堪累月杜鵑猶道不如歸

附錄俞右吉云亡友黃鼎平立二妹一字皆德一字皆令均有才名皆德爲貴陽朱太守房老深自韜晦世徒盛傳皆令之詩畫然皆令青綾步障時時載筆朱門微嫌近風塵之色不若皆德之冰雪淨聰明也徐簡簡字文漪嘉興人休寧吳璵小妻有珮蘭閣

草夢居集

文漪緣情有餘風格未老然亦閨中之秀宮詞云沉香亭子玉勾闌遍植名花按月看第一莫栽紅芍藥此花

開日定春殘

中涓

明制設內書堂以教小內侍用史官四員主之從學者約四十人其後撥入讀書者多至三百人所以教之者有方矣而三百年來此輩善詩文者蓋寡子爲搜訪僅得六人焉此外若楊友呂憲戴義李學輩雖間有詩句流傳多不成章雖欲廣之而未得也

龔輦字中道南昌人宏治中爲內官監左丞有沖
虛集

左丞贈顧潘七律云與君少小定交游今日相逢兩鬢
秋天上風雲真似夢人間歲月竟如流可憐王粲依劉
表不遇常何薦馬周安得忘機共漁父白蘋洲上數沙
鷗見後貌偶作云聖德彰戎服俊貌遠貢將雖然爲異
物費我大官羊陸咸一謂其辭旨溫厚

附錄俞汝成云左丞雅事文墨兼尙理學沖虛一集
所謂空谷之音

張瑄宏治中內官監太監鎮守廣西

平南烏江道中云山東平川小路斜不成邨落兩三家

分明橫幅桃源景只欠溪流泛落花

傅倫正德中都知監太監鎮守桂林

倫題望江亭云山色拂雲青溪光照空碧靜觀元化初
超然意自適

王翺字鵬起順天通州人嘉靖中選入司禮監讀
書歷御馬監右監丞有禁砌蛩吟

監丞集內鄉李蔭于美序之秋夜有懷云西風吹雨夜
蕭蕭客思逢秋倍寂寥十載已虛明主詔半生徒插侍
中貂誰憐季子黃金盡無奈馮唐白髮饒何日一帆江

左去獨尋山水混漁樵

張維字四推霸州人隆慶初選入伴讀東宮歷乾
清宮管事御馬監太監提督內忠勇營有蒼雪
齋橐

張監丞以善詩稱定陵呼爲秀才命掌兵仗局駕幸局
觀所造兵器手翫弄之奏曰兵凶器非至尊所宜操帝
笑而止嘗於禁中退食地植竹數竿定陵題之曰蒼雪
因以名其集瑤臺霽望云天都五月雨一夜洗層臺日
上芙蓉吐鐘鳴樓殿開石根雲卷盡松頂鶴飛來看盡

南巖景筠籃詎忍回

孫隆字東瀛三河人萬歷中以太監督織造駐杭
州

隆題慧因寺詩云笙歌日日娛西子爲愛幽閒到玉岑
舊有高人井西宅沿流且向寺門尋寺在西湖南五代
天成二年吳越武肅王建面玉岑背兔嶺有箕泉流繞
寺門元黃子久曾築室於是

釋子

梵琦字楚石小字曇曜象山人居海鹽天寧寺明

詩三十八言言 卷二 一三三
初徵至京建法會賜座第一有北游鳳山西齋

三集

楚石僧中龍象筆有慧刃淨土詩累百可以無譏和寒
山拾得豐干韻亦屬遊戲讀其北游一集風土物候畢
寫無遺志在新奇初無定則假令唐代緇流覓之猶當
瞠乎退舍矧癩可瘦權輩乎愚菴智及輓章云麻鞞直
上黃金殿鐵錫時敲白下門誦之足以豪矣當日孝陵
所賜袈裟及鉢至今尙存海鹽天寧寺中卽上人所築
西齋也擬陶云新蟬何處來鳴我高槐陰流水欲入屋

好風自開襟牀頭一束書壁上三尺琴琴以散哀樂書
以通古今所幸車馬稀非邀里人欽虛名如北斗有酒
不能斟縱洗爰居耳寧知鐘鼓音曉過西湖云船上見
月如可呼愛之且復畱斯須青山倒影水連郭白藕作
花香滿湖仙林寺遠鐘已動靈隱塔高燈欲無西風吹
人不得寐坐聽魚蟹翻菰蒲

宗泐字季潭臨海人洪武初舉高行沙門居首命
住天界寺尋往西域求遺經還授左善世有全

室集

洪武十四年六月開設僧錄司掌天下釋教事曰善世
曰闡教曰講經曰覺義左右各一員府設僧綱司都綱
有副州設僧正司僧正縣設僧會司僧會明年四月以
戒資爲左善世宗泐爲右善世智輝爲左闡教仲羲爲
右闡教玘太朴爲左講經守仁爲右講經來復爲左覺
義宗鬯爲右覺義先是九年春孝陵幸天界泐公住持
斯寺賞其識儒書知禮義命童髭髮髮長數寸矣欲授
以官固辭帝親作免官說時宋學士景濂好佛帝目爲
宋和尚泐公好儒帝呼以泐秀才嘗奉詔製讚佛樂章

帝嘉歎賜和平日所作詩晚奉旨佚老歸鳳陽之槎峰
帝降書曰寂寞觀明月逍遙對白雲汝其往哉其後僧
智聰坐胡惟庸黨詞連泐及來復謂泐西域取經惟庸
令說土番舉兵爲外應有司奏當大辟詔免死孝陵御
頒清教錄僧徒坐胡黨者六十四人咸服上刑惟泐得
宥蓋受主知者深矣止菴讀其西游集賦詩云一字一
寸珠一言一尺玉其推重若此墨竹行云平生不識雲
心子墨妙通神有如此眼中何處修竹林湘水邊頭烟
雨裏長林蔽虧天爲陰鷓鴣啼斷江沉沉六月南風晝

不熱人家住在叢篁深九疑山帶蒼梧野翩翩帝子雲
中下鳳鸞飛舞蚪龍驤羽葆氍毹翠堪把我昔曾行賞
溪曲兩岍波光漾寒綠萬玉森森一徑遙溪口清陰到
山麓今朝看圖政自憐畫圖身世俱茫然雲心骨化丹
陽土吁嗟墨妙何人傳

附錄徐大章云季潭學博才瓌詩不淪于枯寂在江
湖則其言蕭散悠遠適行住坐卧之情在山林則其
言幽質簡澹得風泉雲月之趣在殊方異域則其言
慨而不激直而不肆極山川之險易風俗之媿惡其

詩衆體具矣

來復字見心自號竺曇叟豐城人元季航海至鄴
止定水寺洪武初召至京太祖覽其詩褒美賜
金襴袈裟授僧錄司左覺義詔住鳳陽圓通院
坐胡黨凌遲死有蒲菴澹游二集

蒲菴與全室齊名然不及全室遠甚蓋全室風骨成削
而蒲菴未免癡肥也游石湖蘭若云荷花蕩西湖水深
上有蘭若當高岑客吟時見猿鳥下僧定不聞鐘磬音
雨香秋林橘子熟雲落空礪棠梨陰閉來掃石坐竹裏

靜與山人論素心五龍之峰雲作屏雙岷削出芙蓉青
何人礪裏拾瑤草有客松間尋茯苓林風不驚虎卧石
山雨忽來龍聽經吳王臺榭今寂寞秋香薜荔花冥冥
燕京雜詠次韻云南風吹到運糧船萬斛香粳倍上年
傳敕漕臺添氣力賜金多辦太平筵鴨綠微生太液波
芙蓉楊柳受風多日長供奉傳新譜教舞天魔隊子歌
秋滿龍沙草已霜射鵬風急朔雲長內官連日無宣喚
徹取黃羊進尙方西湖雜詩云芙蓉灣口綠陰斜吹笛
何人隔彩霞驚起沙頭雙翠羽銜魚飛上刺桐花流觴

亭子鳳山阿都護行春小隊過笑擲金錢花底醉玉簪
彈出白翎歌

附錄愚山云野史載見心應制詩有殊域字觸上怒
賜死遂立化於堦下田汝成西湖志餘則云逮其師
訖笑隱旋釋之見心應制詩載皇明雅頌初無觸怒
之事而笑隱爲全室之師入滅於至正四年俗語流
傳可爲一笑也

守仁字一初號夢觀富陽人四明延慶寺僧持
靈隱洪武中徵授僧錄司右講經升右善世有

夢觀集

明初詩僧有二南洲一溫州人名文藻一山陰人名博洽有二無言一越人名明德一不知何許人名至訥夢觀道人亦有二一晉江人名大圭一富陽人名守仁石倉曹氏乃誤合爲一仁公詩諸體皆合有云盡拋身外無窮事遍讀人間未見書可謂有志者也相傳南粵貢翡翠仁公進詩云見說炎州進翠衣網羅一日遍東西羽毛亦足爲身累那得秋林靜處飛太祖怒曰汝謂我法網密不欲仕我邪幾不獲免按此詩不載集中當出

好事者附會使誠有之必不敢進呈也題方方壺畫云
方壺老人年九十醉把金壺傾墨汁染得蓬萊左股青
烟霧空濛樹猶溼危橋過客徐徐行白石下見溪流清
仙家樓館在何處雲中彷彿聞雞聲古苔蒼蒼烟景暮
藥草春深滿山路招取吹笙兩玉童我欲凌風從此去
懷友云湖草青青上客舟辛夷花老麥初秋一春多少
懷人夢半在鄉山雨外樓題畫云積雨平原烟樹重翠
幄千丈削芙蓉招提更在秋雲外只許行人聽曉鐘

夷簡字易道號同菴宜與人住持杭州淨慈寺又

主南京天界寺除僧錄左善世

洪武四年冬十有二月詔徵江南高僧十人詣京師命
欽天監筮日就鍾山太平興國禪寺建法會以薦國殤
泰厲御製文宣諭天下禁屠宰明年春正月辛酉昧爽
帝服皮弁臨奉天前殿以表授禮部尙書陶凱出午門
鼓吹前導至寺用梵法白而焚之癸亥帝搢圭面佛初
奏善世之曲再奏昭信之曲三奏延慈之曲舞以應節
四奏法喜之曲五奏禪悅之曲夜半六奏徧應之曲徹
豆七奏善成之曲諸樂章皆出宗泐所撰勅僧寶金施

摩伽陀斛法食十高僧者宗泐來復梵琦守仁万金清
濬曇噩慧日居頂及夷簡也建會之日天雨杪櫛子於
山中次日有詔皇太子諸王同觀故夷簡鍾山法會詩
云千騎東華玉輦來春官詔許五王陪近臣共說天顏
喜收得杪櫛樹子回清濬字天淵居頂字元極俱黃巖
人濬徵授右覺義頂亦徵授僧司慧日號東溟住天
竺山曇噩字無夢主國清寺噩題華頂云山翠溼衣晴
亦雨井華寒齒夏猶冰曹娥江云去越王城三十里到
曹娥渡八分湖詩頗磊落惜無全篇合格者

法智吳山僧

余忠宣輓詩方外作者四人非空惠恕祖皦法智惟智
詩爲佳詩云浮屠高出暮雲低雉堞遙連碧樹齊茅屋
人家兵火後樓船鼙鼓夕陽西大江千里水東去明月
一天烏夜啼欲醉忠魂荒冢外白楊秋色轉淒迷

廷俊字用章號嬾菴鄱陽人

一云樂平人

至正末主西

湖淨慈寺洪武元年示寂於鍾山有泊川集

嬾菴送僧歸洞庭云每憶華山寺高居俯洞庭烟中飛
鳥白波面亂峰青賈舶朝依岸禪房夜不扃最憐霜後

橘金子爛熒熒有渡云有渡方舟小無家道路長大荒
天渺渺滄海日茫茫水母浮還沒風鴛出復藏不須寒
雁叫客意已淒涼

附錄愚山云用章善記覽於前人出處言行雖千百
年若指掌尤詳宋事宿儒俱服其博洽葬南屏山危
素著塔銘黃潛杜本李孝光張翥周伯琦皆爲序其
集

如阜字物元餘姚明真院僧洪武初徵至南京卒

於天界寺

物元居雪秘山自營精舍宋无逸述其略云吾鄉雪秘山物元上人所營有軒曰入翠曰逍遙有室曰觀樹有篷曰雪篷有閣曰怡雲曰西閣西閣之前有隙地植茶曰苦茶原植薇曰紫薇坡曰離卉林曰芭蕉亭閣之右偏有大沼瀦山泉而溢竇垣下入溝溝廣四尺泉流紺而潔經閣前不絕通溝植蓮有小木梁跨其上曰白蓮港港之前有地可遊息曰琅玕塢塢之左偏有小屋可宴坐曰桐陰舍其流循舍下注石竇以出而瀦於垣外曰白鷺池其曲曰瀉瀉灣殿閣池館皆曲盡其妙當元

之季隱居之士多治園亭結文酒之社方外自師子林
外若阜公者可稱好事矣

德祥字麟洲號止菴錢塘人洪武中住持徑山有
桐嶼詩集

止菴詩原出東野意主崛竒而能歛才就格足與楚石
季潭巾餅塵拂鼎立桑門蒲菴以下要非其敵姚恭靖
祥老草書歌云祥師只今爲巨擘上與閑素爭嶢峴錢
塘山水甲天下秀氣毓子爲靈檀十年不出筆成冢中
山老兔愁難安晴軒小試烏玉玦雙龍隨手掀波瀾昨

將一紙遠寄我天孫機錦千花攢願師勿置鐵門限從
他需索來熱官縉紳相與歎莫及便欲奪去加巾冠然
則止菴之草書更妙絕時人矣車碌碌云車碌碌上山
遲下山速前車行後車促後車不管前車覆前車已覆
無奈何後車碌碌何其多小築云日涉東園上余將卜
此居草生橋斷處花落燕來初避俗何求僻容身不願
餘堂成三畝地祇有一車書剪燭云風處搖金蛹烟時
閃墨鴉寸心終不昧雙淚欲橫斜漸過分詩刻虛開報
喜花剪聲初落指滿席散春霞

附錄愚山云吳之鯨武林梵刹志稱止菴與夢觀同
參相與肆力於詩夢觀因南粵進翡翠作詩寓諷止
菴亦以西園詩忤上幾不免西園詩云新築西園小
草堂熱時無處可乘涼池塘六月山來淺林木三年
未得長欲淨身心頻掃地愛開窗戶不燒香晚風只
有溪南柳又畏蟬聲闌夕陽不知所謂忤上者何語
野史流傳不足信也集有句谷道中詩云十年三度
上京華則洪武中嘗應召又有爲王駙馬賦清真軒
詩則永樂中尙存也田汝成西湖志云故宋時爲僧

入元屬念舊國有風雨望月諸詩汝成志稱詳博其
疎謬如此

至仁字行中自稱熙怡叟番陽人元末住紹興崇
報寺洪武初主虎邱寺有澹居橐

澹居橐爲饒州路總管府判官皇甫琮廷玉所編僧克
新序之嘗撰楚石行狀有云浙水東西被召者十有六
人余與西齋琦公夢堂璽公與焉則詩雖刊行於至正
中而實登明初之法席者也吳越兩山亭爲尹本中縣
尹賦云蕭然大夫新作亭吳山越山相對青天目雲霞

耀西浙石帆風雨來東溟王霸英雄何足數句踐夫差
兩坏土喜君亂後蘇蒼生白晝彈琴如單父送厚元載
游會稽云江上楊花落孤帆度遠汀潮連滄海白山擁
會稽青內史籠鵝帖仙人放鶴亭登臨有新製毋惜寄
林局

溥洽字南洲山陰人上天竺僧洪武中爲僧錄司
右講經歷左善世尋以讓道衍居右遭讒左遷
右覺義久之復右善世有雨軒集

遜國之事國史太略野史過詳終成疑案程濟梁田王

等未必有其人史仲彬官翰林未必有其事與其惑於從亡致身諸錄無寧信鄭端簡今言所述矣

附錄愚山云鄭氏今言云金川門開溥洽爲建文君薙髮長陵聞其事囚之永樂十六年姚榮靖疾革車駕臨視問所欲言榮國於榻上叩首曰溥洽繫獄久矣上卽日釋之出獄走大興隆寺拜榮國牀下白髮長數寸覆額矣楊文貞塏銘云三四十年間鉅綱老衲有文聲者師與衍公爲首衍公旣進位宮師晚年於師尤厚將化之前一日太宗皇帝親臨視之問所

欲言獨舉師爲對不及其他文貞於洽公繫獄削髮
之疑皆沒而不書但云遭讒左遷又云衍公將化獨
舉師爲對則又彙括其事使讀者習而問之此所謂
不沒其實史臣記事之體也正統三年廬陵周文襄
公忱譟鳳嶺講寺記云公當永樂間嘗爲同列所間
太宗皇帝欲試其戒行幽之於禁衛者十有餘載其
記洽公下獄與文貞塏銘互相證明其事益有徵矣
壬午遜國之事國史實錄削而不書無可考據觀洽
公十載下獄考其所以被讒之故則金川夜遁之跡

於是乎益彰明較著無可疑矣文貞文襄身事長陵
服官史館其所紀載非稗官野史可比鄭氏記遜國
事多流聞失真此其最爲可信者詳稽洽公之行履
用以參補太孫之本紀不當以爲浮屠一人之始終
略而置之也

普莊字敬中仙居入洪武中被召入天界寺歸住
徑山示寂於撫州

莊公自號呆菴作歌云呆菴道人
不識世間秋與春
無榮無辱無疎親讚亦不喜罵不嗔
雖以自訟其矜詡

也多矣

如蘭字古春富陽人住持天竺寺永樂初召授鐫

經律論三藏有支離集

古春與夢觀同游東維子之門東維子有送二上人歸
三竺序其略云余在富春得山中兩生曰蘭曰仁授之
以春秋兵興潛於釋然皆用世之才夢觀爲孝陵尊禮
古春晚出嘗識于忠肅於彌月時亦別古崖之流也曉
發云東風卷雨曉雲收兩岼雞聲送客舟柔櫓不驚沙
上雁殘燈猶照驛邊樓天連野水浮空闊斗轉銀河拂

地流遙望吳城何處是青山數點落長洲

善學號古庭吳人出家大覺寺元末主崑山薦福

明初居光福以寺僧輸賦違期徙贛州行至馬

當山示疾而卒有詩集

附錄毛子晉云古庭長於五言如雲起猿聲斷松高
鶴夢危人疑天上坐鷗訝鏡中飛垣倒夜奔鹿草深
秋聚蛇殿空容鳥入樹老引藤纏令元遺山見之應
解頤也宿晚村云眺望前村近桑麻路欲迷過田衣
拂水綠徑屨沾泥遠嶠寒烟合空林夕照低村翁畱

我宿也解說禪栖

大圭字恒白晉江人泉州開元寺僧有夢觀集

恒白語法侶云不讀東魯書不知西來意此逃墨歸儒
之言也嘗題山居云山色宜茅屋松風滿竹盂湖中泛
月云偶臨湖坐得嘉樹欲傍花行無小船均饒風致夏

日同許氏兄弟遊龜山云

山有大石下有歐陽詹讀書遺址

閒情素乖

俗樂彼中林居林居未云果幽賞意有餘出郭多青山
佳木亦扶疎並游得良友方駕從所如翠微薄炎景蘿
風汎涼裾雲逕步窈窕石門入清虛少畱席豐草綠緜

綿以舒叢柯翳鳴鳥石澗清游魚形神一蕭散疲勸亦
已祛路緣龜巖東遂卽歐陽廬懷賢仰高躅撫蹟驚廢
墟願畱石中室畢誦人間書茲焉恐遲暮眷眷空躊躇

善啓字東白號曉菴長洲人主蘇州永定寺尋主

松江延慶寺授僧綱司副都綱預修永樂大典

有江行唱和詩集

曉菴早負詩名錢塘瞿宗吉賦牡丹詩師與對壘用一
韻賦百首獨菴南洲交器重之嘗被召纂修永樂大典
書成告歸與上竺完公敬修北禪瑾公如珪白蓮車公

指南舟中倡和有江行詩一卷王汝玉序之按大典共
二萬二千九百卷疑編纂之不易而敬修詩云昔出當
嚴冬茲還及春暖蓋不過數月事爾考當日賜鈔者二
千一百六十九人則因編香者多宜成書之速矣

大同字妙止會稽人鄞縣延慶寺僧預修永樂大

典

妙止詩格未高然已脫蔬筍氣懷友云谷風淒已厲習
習吹我襟微烟襲芳樹細雨沾高林雖有一尊酒對此
共誰斟迢遙故人遠矧隔瑤華音安得駕黃鶴往論古

與今緬懷思方續白日苦西沉江邨夕照圖云江邨水
國幽雲樹半含秋落日曬漁網涼風吹客舟香秔黃早
刈碩果熟先收官稅供輸外民歌樂未休

淨倫字大魏昆明人正統中出家天願間參善學
於浮山晚住錫五臺示寂於京師顯通寺有竹

室集

竹室不以詩名往往饒中晚唐風韻五言如松皮山舍
小石子野溪彎雨苔迷石徑山氣冷龕燈七言如晴疊
青山芳沼上冷懸紅日畫樓西半竿落日孤城遠千里

分沙一水流到岸舟橫流水曲尋溪路入落花藤樹頭
落子銜松鼠崖畔飛霜叫竹鷄原上燒痕初過雨隄邊
新柳未拖泥黃茅恰好三間屋赤米看收數畝田亦可
入李和父宏秀集也

元穆淮陽僧

元穆題焦山寺云獅子峰前放晚參直登絕頂縱幽探
帆檣遠近迷蒼靄樓閣高低鎖翠嵐水色倒涵天上下
山形雄壓地東南焦先去後巖扉古樹老碧桃春正酣
天順中鎮江同知府事常山張春命焦山寺僧宏慧輯

寺中題詠止存宗泐二首及元穆此詩

明秀字雪江自號石門子海鹽人祝髮天寧寺晚

居錢塘勝果山有雪江集

王伯安謫龍場驛丞雪江送以詩云蠻煙瘦馬經山驛
瘴雨寒鷄夢早朝一時傳誦之斯未爲警策特以清越
勝耳觀其遺集三卷流轉跌宕不失清江靈一之遺音
臨終偈云一夜小床前燈花雨中結我欲照浮生一笑
浮生滅亦彼法中所謂解脫者日暮云西閣日將夕川
原生暮烟遠林歸倦鳥枯葉抱寒蟬野岫漁簷外秋風

成壘前故人應念我定有尺書傳楚江秋曉次石田翁
韻云山川搖落露華踰野寺鳴鐘破曙暉千里人烟江
郭靜數聲漁笛水禽飛寒催刀尺風霜早日遠關河信
息稀叢菊又開身在客長沙誰念未成衣

一附錄釋冬谿云石門秀禪師以詩名海上游心鶩精
力追唐雅鄭少谷孫太白諸名流多所稱許

普泰字魯山陝西人住京師興隆寺有棲閑集

魯山初見賞於楊君謙復見稱於李獻吉詩名籍甚然
卑卑無甚高調

附錄愚山云君謙訪魯山於興隆寺連日夜話不去
沈石田為作雪夜談元圖魯山詩經君謙選定王濟
之為序

文湛字秋江海鹽天寧寺僧有蘆葦亭稟

秋江詩亦清徹可云筆非秋而垂露嘗輯江海羣英集
行世者也送王景仙云碧梧秋晚葉皆稀何事行人又
遠違落日天涯千里別西風江上片帆歸山城月出聞
猿嘯候館霜清見雁飛此後定知難會面相思惟有淚
沾衣

方澤字雲望號冬谿嘉善人秀水精嚴寺僧有冬

谿內外集

冬谿詩格清純不雜偈語宜爲唐應德方思道屠文升
所稱古意云孟冬風始寒鴻雁凌晨飛疇昔嘉樹林枝
葉日以稀一隨氣運變誰能覺其非賢者貴特達在遠
諒不違君看松柏姿歲晚長依依泖月樓夕眺遲蔣白
灘不至云飄風鳴軒櫺落葉辭高柯薄暮登層樓伊余
心未和悠悠遠天雲泛泛清川波去者曾莫留來者奄
忽過千秋旦暮事百歲寧足多但願狎所親歡至相與

歌幽人期不來奈此涼月何寄平野上人云惠朗南歸
後空山兩月過青春看已暮白髮近如何雨外鶯聲遠
風前柳絮多遙知清夢裏還繞舊烟蘿

附錄彭子殷云嘉靖開士以善詩鳴者三人谷泉福
玉芝聚西洲念冬谿子與之倡和古體上仿漢魏而
律一以初盛唐爲準晚乃旁溢稍及於錢劉皇甫諸
家然力以繩墨自維語涉纖險輒擯去之猶法吏之
慎守三尺嗜古者不以瓦缶雜鼎彝也

果斌號半峰嘉靖初住持天界寺有半峰集

半峰少從顧華玉游而詩未得其一體王十岳山房云
小隱空山絕四鄰野雲孤鶴自相親誰知一徑深如許
猶有敲門看竹人

附錄顧元言云半峰詩多成於中夕沉思苦索而後
得之對客揮毫非所能也正如南能腰石碓米已熟
但欠篩在

真可字達觀吳江人一云句容世號紫柏大師有茹退

集

吾郡楞嚴寺建自宋嘉祐八年至嘉靖間爲勢家所占

紫柏特興復之先從祖君升諱大猷經營規度象設皆
冶銅爲之佛書三藏易梵夾爲方冊鏤板貯之徑山流
通宇內旣而游大房石經山進隋僧淨琬所藏佛舍利
慈聖太后迎入宮中特賜紫伽黎俄而妖書獄起辭連
入詔獄死集中吳氏廢園作云汾陽門第晉風流縹緲
吳山感勝游今日松蘿誰是主斷雲殘月鎖江樓蓋卽
楞嚴寺基先叔祖中萬歷壬子舉人

斯學字悅支號庾山海鹽慈會寺僧有幻華集

庾山詩格清圓句如薄衾寒入夢細雨遠沉鐘白雲非

舊王黃葉自前朝客來黃葉兩鬼嘯白楊風太原山繞
中條近小有天通上界寬均有幽致禪藻集載某居士
稱之曰清水勵操栗玉明襟韻似道林不屑養馬才優
無可不愛除官可云賞譽之至雜詩二首云落日迫西
崦吐月銜東島逝景故悠悠人世漫浩浩所思耿中情
憂愁怒如擣宴會苦不常容顏徒自老子有鼓與鐘勿
伐亦勿考一委溝壑中身名同腐草披雲卧邱壑凌風
稅籠樊芳節忽已邁朱明照前軒嘉樹滋以綠幽草萋
以繁丹霍耀庭戶黃鳥啼林園俯聽石潭響仰視高岷

清言言言 卷二 一一三
三
瞰佳期託縣圃遐想踰崑崙臨川有長歎與智者言
邊城晚眺云獨上層樓望欲迷滿城砧杵更悲悽河流
曲抱內黃北山勢遙連太白西落葉亂隨秋雨下斷鴻
斜引夕陽低自來幽朔寒偏早繞樹啼鳥未肯栖

智舷字葦如號秋潭秀水金明寺僧有黃葉菴詩

集

上人餅錫舊地在金明寺湖天海月樓東有老梅橫牕
日吟咏其下後移郊西之黃葉菴邨深水曲物外蕭然
而以善行草書造請滿戶限上人亦不憚煩有求者必

應也詩不存稟好事者就長箋橫幅傳抄輯爲上下卷
刊行之鷓鴣居云不須太倉粟滿腹飽卽休何必上林
樹一枝倦且投却笑叢薄間爭棲暮啾啾安知鵲有巢
終焉居者鳩人日感舊云去年人日游何處穆家池館
寒梅樹今年人日勞夢思穆家池館非舊時兀兀頽簷
遙倚遍主人何日還相見邨南邨北柳樹邊烟條弄影
青苔面竹圍衡門池水寒嗟君夙昔此盤桓而今細雨
生春草縱有梅花若箇看送万同叔游天台云浦樹離
離接遠天片帆遙向赤城懸春風幾日滄江上驛路千

峰落月前水冷石梁窺洞壑花深巖殿宿雲烟從君此
去看霞色猶是興公作賦年題徐春門畫云山頭雲溼
皆含雨溪口泉香盡帶花此是天池穀雨候松陰十里
賣茶家

法杲字雪山吳人居華藏寺有雪山集

雪山參學於雪浪與巢松一雨齊稱詩如鳥來迎戶人
花發隔溪看芳樹橋邊盡春山雨後新野黃潮撼樹江
黑雨藏山均饒清韻有集八卷一雨所輯王伯穀極賞
之謂爲近代詩僧領袖梁溪道中逢姚孟云十載俱漂

泊鷺逢落照前浮雲本無意芳草似相憐春水連平野
人家入遠天還乘明月色隨意放吳船

欽義字湛懷金壇人南京報恩寺僧

周吉甫編長干三僧詩湛懷與焉其二則雪浪愁山也
雨夜泊涇縣云水宿同鷗鷺平沙晚帶船山城寒漱浦
溪雨暗蒸爛漁火深秋樹河流淺暮天西風鄉思切千
里獨依然

宏灝字空波鄞人傳慧弟子

上人朗初學詩於楊伯翼侍几杖於五井山伯翼遺草

得傳皆其力也朗初以詩法轉授空波及西來休遠時
人以此支遁支亮支纖謂之一朗三支云秋江晚歸云
流覽山川幽意多渾忘落日挂藤蘿潮催客子還家權
風送漁舟入浦歌深樹烟披連翠幕遠峰雲在失青螺
臨行笑指芙蓉發明日還期倚杖過

行恣字口擇號復元湖州人有且止菴詩集

恣公少出紫柏之門而不相下居於南潯與馮開之朱
文寧董遐周允仲弢輩結方外社遐周稱其口不談貴
介筆不流凡近文寧至謂字字作金光明色譽之未免

過賈吳江道中與陸叔度並載晚至鷺脰湖別云斜日
松陵道扁舟共汝還不期初握手旋復動離顏水積猶
餘岼雪多莫辨山宵來分寢處宛在澈沙間

圓信字雪庭更字雪嶠寧波人初住武康雙髻峰

後居徑山有語風橐

雪公造詣淵微與天童悟禪師同爲禹門法嗣天童以
巾拂付弟子一十二人再傳登獅座者多至六百七十
八人居士不與焉雪公終身不付一弟子手攜藤杖甚
奇古或見之以爲難得雪公笑曰小大魔王動以拄杖

拂子付八十年之後此物不中打狗謂悟公暨通容也
將示寂坐高齋俛見擔糞者過其下呼至授以拂子曰
拏去趕蒼蠅可謂獨立不懼者已其居徑山書亭柱云
孤雲游此中萬山拜其下臨終偈云三間茅屋傍溪住
兩扇竹牕關月眠均瀟灑有致早秋對雨作云方花礎
潤晚涼歸隔浦蓮舟望漸稀林下自聞秋葉雨燈前亦
有草蟲飛巡檐半溼黃藤杖倚檻重添白苧衣明發雪
溪新水下前邨應沒舊魚磯尤覺出塵

海明號破山四川人主嘉興東塔寺後入蜀有破

山語錄

張獻忠殺人之多較黃巢百倍自甲申正月犯蜀陷重慶悉斷民右手既破成都僭號大西改元大順授其義兒孫可望爲僞平東將軍監十九營李定國爲僞安西將軍監十六營劉文秀爲僞撫南將軍監十五營艾能奇爲僞定北將軍監二十營次年五月可望報一路殺男子五千九百八十八萬女子九千五百萬定國報一路殺男子七千九百餘萬女子八千八百餘萬文秀報一路殺男子九千九百六十餘萬女子八千八百餘萬

能奇報一路殺男子七千六百餘萬女子九千四百餘
萬此外各營分勦川南川北所殺之數及獻忠僞御營
殺人數目自有簿記之不與焉於是四川之民靡有孑
遺迨屯營于西充鳳皇山至自殺其卒日一二萬人初
殺蜀卒蜀盡則楚楚盡乃殺共起之秦人後令量之以
度過不及者皆死駐西充時尚存兵一百三十萬逾兩
月則則宰割者過半矣相傳破山和上嘗勸賊帥李止
殺賊帥以羊豕進曰和上食此吾當封刃破山遂食之
此破山之徒杖雪通醉載之語錄者綏寇紀略謂勸張

獻忠誤也子友高念祖對予述之

道源號石林太倉州人居吳北禪寺有寄巢詩集

石林好讀儒書嘗類纂子史百家爲小碎集又以餘力
注李義山詩三卷其言曰詩人論少陵忠君愛國一飯
不忘而目義山爲浪子以其綺靡華豔極玉臺金樓之
體而已第少陵之志直其詞危義山當南北水火中外
箱結不得不紆曲其指誕謾其辭此風人小雅之遺推
原其志義可以鼓吹少陵惜其書未刊行會吳江朱長
孺箋義山詩多取其說間駁其非於是愚山詩家謂長

孺陰掠其美且痛抑之長孺固長者未必有心效齊邱
子也早梅云萬樹寒無色南枝獨有花香聞流水處影
落野人家雪後畱雲淡籬邊待月斜牀頭看舊歷知欲
換年華題徐巢友元洲云聞之上古人都_不記寒暑來
者問以年笑指花開處湖邨晚興和韻云芙蓉水面落
殘紅尚有餘香逐岼風一片秋光描不得翠禽時掠夕
陽中

道盛字覺浪閩人住金陵天界寺

浪公早登猊座聲動楚越之交白蓮之社不少宗雷青

豆之房恒多龍象詩如清明微雨後花鳥亂飛時苦竹
長遮徑高松自護關足稱天籟清機也浴龍池云枕流
漱石亦何心苻帶蘋花何處尋夜靜月明風在樹坐聞
泓下有龍吟

羽士

張宇初字子璿廣信人嗣漢四十二代天師賜號
無爲真人有峴泉集

古今詩僧傳者不少黃冠率寥寂無聞唐惟上官儀吳
筠曹唐稍能詩然儀唐皆不終于黃冠則不得以黃冠

目之矣惟元時道教特盛所稱邱劉譚馬郝王孫七真者大半有集迄于至正如張雨伯雨馬臻志道是皆軼倫之才明初僅張宇初余善二人無戾風雅已爾餘皆卑卑鮮足當詩人之目此外龍虎山人張畱紳有詩見臨川胡琰大明鼓吹又黃徵君俞邵編明史藝文志有佘和叔同亭詩悅一卷武卮道士張蚩蚩適適吟一卷安仁沖虛山道士顏服膺潛菴詠物詩六卷訪之未得附載之子璿擬古云朝陽生東樹微月流西岑清泉活活流好鳥交交吟春夏氣候殊涼燠白駿尋美人崇蘭

佩芳香襲衣襟邈然與世隔空睇瑤華音響修曷爲言
感慨投吾簪養疾云濯足山澗中杖策暝乃還寒螿鳴
疎樹落日下西山灌園露已濕倦息衡門間窶空非苦
疾鶉衣畏早寒寧貽榮叟詢齒落無衰顏

附錄愚山云宇初五言古詩意匠深秀有三謝韋柳
之遺響唐宋以來釋道二家並重明初名僧輩出而
道家之有文者宇初一人厥後益寥寥矣

余善字復初玉峰清真觀道士

復初追和張外史游仙詩云城闕芙蓉曉未分身騎金

虎謁元君青童不道天家近笑指空中五色雲溪頭流水飯胡麻曾折瑤林第一花欲識道人藏密處一壺天地小於瓜不到麟洲五百年歸來風日尙依然穉龍化作雪衣女來問東華古玉篇春宴瑤池日景高烏紗巾上插仙桃長桑樹爛金雞死一笑黃塵變海濤

附錄楊廉夫云方外生余善追和張外史游仙詩讀至長桑樹爛金雞死有客遶牀三叫以爲老鐵喉中語又如一壺天地小於瓜雖老鐵無以著筆矣

席應珍字心齋號子陽子常熟人提舉致道觀

子陽子題章復畫碧桃云憶昔瑤池侍宴時碧桃花下
酒盈卮今朝醉裏看圖畫羞對東風兩鬢絲

附錄愚山云子陽子嘗居相城靈應觀與沙門道衍
爲忘形交道衍因師事之衍卽姚少師廣孝或云少
師兵法半是心齋所傳

周思得字養真別字素菴錢塘人有宏道集

素菴夢游仙詩云翩翩鶴羽拂重雲仙樂嘈嘈世未聞
一虎借騎何處去定應月下訪茅君

附錄俞汝成云真人扈從成祖北征恩寵甚厚歷事

五朝晉秩二品享年九十諭葬賜塋亦古今所希觀者顧元言云養真羽流高逸被文皇之眷游仙諸詩殊有思致

錢月齡字鶴山無錫人居洞虛宮有丹邱漫稿

鶴山花前詩云有酒當醉花前人莫教啼鳥傷殘春流光轉盼赴壑水好花回首飛成塵請看自古繁華地年年惟見蓬蒿新訪僧田舍云出郭尋僧舍青山隔水田扁舟孤墅入紅樹碧溪連菰米炊香積茅茨帶夕烟相畱無限意我亦愛逃禪

附錄俞汝成云鶴山吳越王鏐二十一世孫吟亦成章
顧元言云道人詩如盆涵魚藻小有幽致

吳孺子字少君金華人嘉隆間以黃冠游吳楚間
有吳少君集

少君周游吳楚間畱樵李獨久性至巧工于製器一瓢
精絕過荆溪爲盜所擊王元美爲作破瓢歌嘗煉白堊
爲竈名玉雪廚以白米置冬春困中令微黃號檀香米
一杖用綠萼枝條爲之名紫玉杖最愛青苔天新雨輒
尋牆陰階面得一苔博必詫人對客言每稱荀卿性惡

之說詩六卷沈嘉則趙汝師爲作序鄒彥吉爲作墓銘
余仲房王伯穀爲作傳姚叔祥爲述遺事均未嘗言其
爲道士獨顧元言韓國雅目爲黃冠今從之寄別錢懋
穀云曲抱孤邨水長流斷岬陰借居方避地言別又沾
襟客久衰偏易鄉遙恨轉深把君書在手侵曉到如今
倚杖云貧病吾將老江湖度歲華艱難惟有淚飄泊更
無家倚杖慚歸鳥臨池惜落花秋風何太早瑟瑟向蒹
葭欲製羽衣云野服前年製羽衣今日無忽見白鷺鷥
遠在青草湖

徐穎字渭友更字巢友海鹽學生以註誤逃于僧
自楚歸入茅山爲道士好談兵以徐鴻客姚廣
孝自許後不知所終

巢友汗漫之游投軀嶺海其詩間入貝編雲笈之中拾
孔翠一毛足勝凡鳥累百宿何氏山居云日南氣多燠
草樹冬未黃山行不山宿愛君溪上堂邨居百事集異
書探石倉香秔初脫杵嘉魚出寒塘旣觴復就奕明月
登我牀野田犬驚睡每吠燈燭光乃知靜者意所遇皆
故鄉西嶽云拔地蓮花在多年玉井湮黃河西有影雲

棧四無鄰冰窟難成水楓香漸化人夕陽不易落閒立
數三秦巖陵云石几朝朝立鷺鷥苔檐露折野棠枝雙
臺占得高千尺不許他人下釣絲

李延是初名彥貞字我生一字期叔後更今名改
字辰山上海人隱于醫晚居平湖佑聖宮自稱

道士有放鵬亭集

辰山生長士族人不知其門闕策名仕版人不知其官
資博綜圖籍人不知其儲藏潔治酒肴人不知其庖爨
所撰崇禎甲申錄南吳舊話足以裨國史之采擇及疾

革平居玩好一瓢一笠一琴一硯悉分贈友朋而以儲
書二千五百卷畀子誦其詩知爲徐孝廉闇公之弟子
然其出處本末終莫得而詳也詩亦伯仲幾社諸君人
之黃冠中翹翹東楚和陶飲酒詩云寄此一椽下日遭
羣動喧我自飲吾酒勿覺日影偏終身在城市仍不異
雲山清風與明月有時相往還昨者事已往今者又何
言蜜蜂投蛛網救之遭螫痛定後示道士閻風云天地
孕萬物而各具殺機大小互爲忍其事嘗因依蜘蛛尤
巧惡以坐而制飛蜜蜂翩翩來含芳昧所歸忽在羅網

中蛛喜逞其威但肆齒牙利不嫌軀體肥舉頭乍見之
手與解其圍蛛既患得失蜂詎解從違賈勇螫吾手負
痛心力微吾病蜂得生兒童任相非善且不可爲斯言
識者希緣溪行云瘦筇不老芒屨輕青錢三百隨我行
溪橋數折人人境日落更喜羣山青酒壚遙對菊花好
東籬豈有陶淵明慰孝先云東湖一片水喜汝暫停舟
既有故人在能無十日畱殘花仍滴露新漲正浮鷗生
計安垂白從人笑直鉤

女冠

尼

女冠盛于唐楊太真以開元二十三年既冊爲壽王妃
尋度爲女道士敕曰壽王瑁妃楊氏素以端懿作嬪藩
國雖居榮貴每事精修屬太后忌辰永懷追福以茲求
度雅志難違用敦宏道之風特遂由衷之請唐會要公
主度爲女道士者一十四人金仙玉真萬安楚國華陽
漢陽潯陽平恩邵陽永嘉永安義寧義昌安康下而宮
人入道朝士輒爲賦詩花間尊前詞客無不倚聲填女
冠子小令蓋風尚則爾然自李冶魚元機外女冠之能
詩者寡由宋以降益復寥寥元有官人王金蓮晚爲道

士提點昭應宮卒贈淵靜元素真人袁桷爲之草制此
僅事也至於象教東流比丘尼當一時俱集矣而
尼至晉建興中始有之莊嚴寺僧寶唱撰比丘尼傳以
洛陽竹林寺尼淨檢稱首焉宋有妙總爲蘇魏公頌孫
又溫州淨居妙道禪師係黃公裳女並有法語見傳燈
錄明正統中有呂姑諫阻裕陵北征復辟後爲建順天
保明寺都人目爲皇姑寺者是已顧終明之世禪學頗
盛而尼之著作無聞迨天啓崇禎之季始有付巾拂立
禪林者因合女冠爲一卷

羅素月惠州羅浮山女道士

素月梅花邨絕句云麻姑仙窟鮑姑山鳳子翻飛遠嶠
還玉女峰頭人冷笑杜蘭香去嫁人間

吳靜婉金壇人蘇州木瀆女道士

靜婉別思詩云西崦雨未收東崦風又作畱住綠蓑衣
莫與篙師著

行徹字繼總衡州人劉善長之女嫁陳氏子而寡
中歲出家爲僧通徹弟子住嘉興福國禪院有

語錄

繼總偈語多近詩者如山居云野猿採果熟巢鳥入林
深送人云晚食蓴絲滑秋衣薜荔輕落葉云秋聲千葉
墜遠影一巢孤均有郊島風骨秋日懷母云不見慈闈
秋信來籬邊黃菊帶霜開爲憐消息無人寄一日峰頭
望幾回

行剛號祇園嘉興人處士胡日華女嫁諸生常公
振未期而寡中歲出家爲僧通乘弟子住嘉興
梅會里伏獅院有語錄

石車乘禪師以如意付祇園此崇禎丁丑年事先伯祖

母趙淑人嘗師事祇園疑義必質故余少日曾見之威儀醇樸母論空門行業卽以節婦論亦宜存其片言以當鳳樓新誡也淑人崇禎間兩朝中宮周后語宮人云朝中命婦率籩簞戚施薄福之相維刑部朱侍郎妻莊嚴婉麗稱此象服爾孟夏關中詠云百結鶉衣倒挂肩飢來喫飯倦時眠蒲團穩坐渾忘世一任塵中歲月遷

神一初名淑吉字美南姓夏氏考功允彛女也歸侯洵二十而寡遂削髮爲尼更今名改字荆隱

有龍隱遺橐

荆隱悼亡云蕭蕭鑿元夜幽室生微涼眷言念君子沉
痛迫中腸音徽日以杳翰墨猶芬芳靈帷空蕭條齋奠
真荒唐舉聲百憂集泣涕不成章詩不期工一真摯足
以傳矣

教坊

明制南北都各立教坊司北有東西二院南有十四樓
其後南都舊院特盛成宏間院中色藝優者結二三十
姓爲手帕姊妹每月節以春粢巧具殺核相鬪名爲盒
子會沈啓南曾爲作圖係以長句然青樓之題詠無聞

也隆萬以來冶游漸盛浙有沈水部某託名冰華梅史以北京東西院妓郝筠等四十人配作葉子牌金沙曹編修大章立蓮臺新會以南曲妓王賽玉等一十四人比諸進士榜一時詞客各狎所知假手作詩詞曲子以長其聲價於是北里鮮有不作韻語者其偽真無由而辨識矣姑從諸家選本綴錄成卷

趙麗華字如燕小字寶英南院妓自稱昭陽殿中人

如燕父銳以善歌樂府供奉康陵如燕年十三錄籍教

坊能綴小詞被入絃索予嘗得其書畫扇楷法絕佳其
詩云感君寄吳牋牋上雙飛鵲但效鵲雙飛不效吳牋
薄後題乙卯中秋同西池徵君質山學士集海濱天香
書屋書此竟聞任兵憲在陸涇壩禦倭大捷奏凱回戈
亦快事也沈嘉則爲作傳有云趙雖平康美人使具鬚
眉當不在劇孟朱家下今卽其題扇數語蒙岩可知賦
別一詩亦手書便面者詩云妾舟西發君舟東頃刻天
生兩處風此去雲山天際渺寸心千里附冥鴻

徐翩翩字飛卿一字驚鴻南院妓有集

翩翩年十六時名未起學琴不能操纓學曲不能按板
因舍而學詩謝少連於衆中見之曰此陳王所云翩若
驚鴻者也由是人咸以驚鴻目之有妹亭亭字若鴻亦
慧黠翩翩晚嫁江陰郁生郁卒還秣陵開剝爲尼居蓮
子營小菴以老江陰送顧太學云一日發江口五日下
長洲可憐送君淚不隨江水流

趙彩姬字今燕南院妓

今燕張幼于所狎名冠北里時曲中有劉董羅葛段趙
何蔣王楊馬褚先後齊名所稱十二釵也晚居琵琶巷

清元方言言 卷二二二二
口石游少年號曰閉門趙四其詩清越頗勝諸人暮春
江上送別云一片潮聲下石頭江亭送客使人愁可憐
垂柳絲千尺不爲春江綰去舟憶故居云柳絮春泥玉
壘封珠簾深鎖暮烟濃分明記得雙棲處夢繞青樓十
二重送幼于還吳門云花前雙淚溼衣裾把酒江亭落
照餘此去吳門霜月滿逢人好寄洞庭書寄陳八玉英
云何處簫聲獨上樓傷心桃葉水空流一從南國春歸
後無復佳人字莫愁

馬守真字湘蘭一字元兒又字月嬌金陵妓有集

湘蘭貌本中人而放誕風流善伺人意性復豪俠恒揮
金以贈少年感吳人王伯穀解墨郎之阨欲委身焉伯
穀不可萬歷甲辰秋伯穀年七十湘蘭買樓船載小鬟
十五造飛絮園置酒爲壽晨夕歌舞流連者累月亦勝
引也常作擬古詩云自君之出矣不共舉瓊卮酒是消
愁物能消幾箇時姚園客云誦之令人酸楚伯穀序其
詩大略云秣陵佳麗之地青樓狹邪之間桃葉題情柳
絲牽恨胡天胡帝爲雨爲雲有美一人風流絕代問姓
則千金燕市之駿託名則九畹湘江之英輕錢刀若土

壤翠袖朱家重然諾如邱山紅妝季布爾其搨琉璃之
管字字風雲擘玉葉之牋言言月露翻庭花之舊曲按
子夜之新聲奚特錦江薛濤標書記之目金昌杜韋惱
刺史之腸而已哉曲中傳爲佳話

鄭如英字無美桃葉妓

無美以韶豔聞曲中呼爲安十二安其小名也詩筆流
便但不服持擇耳雨中賦別云執手難分處前車問板
橋愁隨風雨長魂爲別離消客路雲兼樹妝樓暮又朝
心旌誰復定幽夢任搖搖

景翩翩字三昧

一作驚鴻

建昌妓嫁丁長發丁爲人誣

訟于官景竟自經有散花吟

王伯穀題散花吟云閩中有女最能詩寄我一部散花
詞雖然未見天女面快語堪當食荔支翩翩家本盱江
時游建安故伯穀誤以爲閩中女子也時又有沙飄飄
新都謝少連撰季漢書成其友醪金賀之布席齊王孫
第四方之士會者百人選六院麗人侑酒飄飄爲冠評
者比之揚州蕃禧觀瓊花末有兩樹云翩翩襄陽蹋銅
蹄云駿馬蹋銅蹄金羈豔隴西郎能重意氣妾豈向人

帝與蘇生話云十日平原飲三秋江上船一經搖落後
明月幾回圓

薛素素小字潤孃嘉興妓有異才數嫁皆不終有

南游草

薛五較書有十能詩書琴奕簫而馳馬走索射彈尤絕
技也予見其手寫水墨大士甚工董尚書未第日授書
禾中見而愛之爲作小楷心經兼題以跋至山水蘭竹
下筆迅掃無不意態入神聞在京師挾彈走馬能以兩
彈丸先後發使後彈擊前彈碎於空中又置一彈於地

以左手持弓向後以右手從背上反引其弓以擊地下
之彈百不失一嘗置彈于小婢額上彈去而婢不知江
都陸無從歌云酒酣請爲挾彈戲結束單衫聊一試微
纏紅袖袒半鞬側度雲鬟引雙臂侍兒拈丸著髮端回
身中之丸竝墜言遲更疾却應手欲發未停偏有致范
夫人贈詩云重開別院貯文君寶絡千金換翠裙非雨
非雲香滿路前身應是薛靈芸尋爲李征蠻所嬖又嘗
侍沈孝廉景倩巾櫛其畫象傳人蠻峒西陽彭宣慰深
慕之費金錢無算致之不得也春日過茅山一律云參

差臺殿闕靈蹤句曲茅君次第逢
洞口鶴窺曾過客日
中人以上最高峰
華陽澗水桃千樹
舊館壇碑闕幾重
遙望金沙何處是
浮圖千尺罩烏龍

周文字綺生嘉興妓

綺生善小詩沈純父林居端午召客呼之侑酒不至次
日始來問其故曰昨偶席上賦詩未就耳純父曰爾能
詩試卽景以五月六日爲題綺生朗吟云酒剩蒲觴冷
門懸艾虎新坐客咸擊節由是詩名大起縉紳若高元
翔李君實皆與酬和綺生嘗有句云掃眉才子多相忌

未敢人前說較書蓋自傷也錢氏列朝詩集謂爲松陵一元氏負之而趨悒鬱而死所云一元氏者除名會元沈同和志學也予於乙酉冬猶及見之酒間談論援今證古娓娓不休亦未至以五七言讀詞回環迄不能句第於帖括則全不解耳詠懷云幾點愁人淚不許秋風吹吹到長江裏江流無盡期

王微字脩微揚州妓有期山草樾館詩集

脩微皈心禪悅自號草衣道人初歸歸安茅元儀晚歸華亭許譽卿皆不終重過雨花臺望江有感云春姿靜

東岑雲影結遙粲坐覺高臺空不知翠微半落花自古
今啼鳥變昏旦撫化良易遷卽事聊成玩况乃晴江開
淥波正拍岫夾山漾別陳仲醇云夾山寒水落木葉下
紛紛斜日已難別扁舟况送君瑤華一以折零露不堪
聞爲我題紈扇新詩寄白雲仙家竹枝詞云幽蹤誰識
女郎身銀浦前頭好問津朝罷玉宸無一事壇邊願作
掃花人憶江南云寒沙日午霧猶含蕭瑟風光三月三
撲地柳花新燕子不由人不憶江南

楊宛字宛叔金陵妓有鍾山獻正續集

止生得宛叔深賞其詩序必稱內子旣以譴荷戈則自
謂有詩人以爲成婦兼有句云家傳傲骨爲迂叟帝賚
詞人作細君可云愛惜之至顧宛叔恆思背之秋懷詩
云獨自支頤獨自愁深情欲語又還羞從來薄命應如
此敢比鴛鴦到白頭棘心已露矣止生亡後思倚國戚
田宏遇以其賄遷不期宏遇第以衆人畜之尋俾其授
琴書於季女甲申寇變宛叔攜田氏女至金陵匿山邨
中盜突入其室欲汚田氏女女不從宛叔從旁力衛之
遂同遇害詩如江清風定候山碧雁來天亦稱佳句其

行楷特工能於瘦硬中逞姿媚洵逸品也種桐五古云
靜居無寄懷種桐廣除內桐高盈丈餘風露相吸逮本
以遲鳳棲鳳棲不可再我聞古良士往往思其外預愁
斷爲琴知音復誰在哭侍兒湘雲云湘水千年在湘雲
去不回牀頭鍼線帖此後更誰開春日有感云翠館紅
樓白石橋高花低柳自飄飄畫闌幾處無人到多少春
光暗裏消次止生七夕見懷韻云遙遙望斷白蘋洲惟
見銀河一派流那得閒情還乞巧夢魂尋遍木蘭舟
附錄茅止生云宛叔歸余年纔十六能讀書工小楷

其於詩遊戲涉略若不經意然無枯澀之色鮮潤流
利 愚山云宛叔能詩有麗句善草書歸茗上茅止
生重其才以殊禮遇之止生歿國戚田宏遇奉詔進
香補陀謀取宛叔宛叔盡橐裝奔焉田以老婢子畜
之俾教其幼女宏遇死復謀奔東平侯劉澤清將行
而京城陷乃爲丐婦裝間行還金陵盜殺之于野宛
叔與草衣道人爲女兄弟道人屢規切之宛叔不從
道人皎潔如青蓮花亭亭出塵而宛叔墮落汙泥爲
人姍笑不亦傷乎

顧娟娟嘉興妓

娟娟居蘇小小墓東北短小穠粹妙歌舞雙鞦柔弱胡
旋燈前觀者靡不歎絕間作小詩以書法不工偶對人
口占而已崇禎末年卒贈別句云南國相思子西番篤
耨香留君充雜珮休賄紫羅囊